

Maktab Duli pembentang terbaik

Berita dan Foto : Noraisah Muhammed

BELAIT, Sabtu 6 Jun. - Maktab Duli Pengiran Muda Al-Muhtadee Billah (Maktab Duli) sebagai pasukan pembentang telah dianugerahkan sebagai pembentang yang terbaik dalam Pertandingan Akhir Bahasa Inggeris Sekolah Antarabangsa Senegara.

Sementara itu, penyampai yang terbaik untuk kedua-dua pusingan awal dan akhir telah direbut oleh Brandon Chin Wei Chun juga dari Maktab Duli.

Pertandingan tersebut diadakan di Dewan Serbaguna di Sekolah Menengah Sayyidina Ali, Kuala Belait, di sini.

Hadir sebagai tetamu kehormat ialah Setiausaha Tetap Jabatan Perdana Menteri (Media dan Kabinet), Awang Haji Mohd. Rozan bin Dato Paduka Haji Mohd. Yunus.

Enam buah sekolah telah mengambil bahagian dalam pertandingan itu bagi Standard

Parlimen 2015 Asia di pusingan awal. Pertandingan diadakan untuk memilih pembahas mewakili negara ke pertandingan serantau dan antarabangsa seperti Musleh Antarabangsa Tahunan dan Debat Dunia Tahunan.

Objektif utama acara ini termasuk menggalakkan kepentingan dalam membahaskan seluruh sekolah di Negara Brunei Darussalam untuk mencapai kecemerlangan dalam berdebat dan kemahiran pengucapan awam, untuk menggalakkan penggunaan bahasa Inggeris melalui pertukaran pendapat secara lisan.

SETIAUSAHA Tetap Jabatan Perdana Menteri (Media dan Kabinet), Awang Haji Mohd. Rozan bin Dato Paduka Haji Mohd. Yunus bergambar ramai bersama pemenang Pertandingan Akhir Bahasa Inggeris Sekolah Antarabangsa Senegara.



Zahirkan rasa kecintaan kepada Rasulullah menerusi selawat



UCAPAN alu-aluan oleh Pengerusi Kelab Khidmat dan Qasidah Pusat Belia (KHIDMAT), Awang Mohammad Hairollah bin Mustapha.

BANDAR SERI BEGAWAN, Sabtu, 6 Jun. - Majlis Selawat Empat Daerah yang diadakan di negara ini adalah untuk menzahirkan rasa kecintaan serta kasih sayang kepada Allah Subhanahu Wata'ala dan Rasulullah melalui bait-bait syair serta qasidah yang dibacakan sekali gus memberi kesempatan kepada para hadirin untuk menghayati sambil mengenali Rasulullah.

Justeru, Majlis Kemuncak Selawat Empat Daerah sempena Sambutan Isra' Mi'raj Tahun 1436 Hijrah telah diadakan di Balai Sarmayuda, Dewan Bahasa dan Pustaka, Lapangan Terbang Lama, Berakas, di sini.

Hadir selaku tetamu kehormat majlis ialah Timbalan Setiausaha Tetap, Kementerian Hal Ehwal Ugama (KHEU), Awang Haji Harun bin Haji Junid.

Majlis yang dianjurkan oleh Kelab Khidmat dan Qasidah Pusat Belia (KHIDMAT), sebuah kelab di bawah naungan Jabatan Belia dan Sukan (JBS) turut dihadiri oleh kira-kira 100 peserta antaranya terdiri daripada pegawai dan kakitangan dari JBS, Jabatan Pendidikan Kokurikulum dan KHEU, ahli-ahli persatuan dan kumpulan tausyah, mahasiswa-mahasiswi universiti, penuntut-penuntut dari pusat tingkatan enam, maktab serta orang ramai.

Majlis yang membawa tema 'Belia Brunei Berselawat' itu telah

dimulakan dengan bacaan Ratib Al-Attas yang dipimpin oleh penuntut dari Institut Tahfiz Al-Quran Sultan Haji Hassanul Bolkiah, Awang Haji Mohamad Adi Saufi bin Haji Aminuddin, yang seterusnya memimpin Sembayang Fardu Isyak Berjemaah.

Manakala bacaan Surah Al Faatihah dipimpin oleh Awang Adi Aismat bin Latat dari Universiti Islam Sultan Sharif Ali (UNISSA).

Pengerusi KHIDMAT, Awang Mohammad Hairollah bin Mustapha dalam ucapannya melahirkan penghargaan kepada JBS dan Jabatan Kokurikulum atas sokongan yang telah diberikan dalam menjayakan Majlis

Selawat Empat Daerah tersebut, di samping merakamkan penghargaan kepada Pusat Da'wah Islamiah (PDI), di atas bantuan dalam memproses penapisan qasidah sehingga dapat disampaikan kepada hadirin yang hadir.

Majlis Selawat Empat Daerah ini mendapat sambutan yang menggalakkan daripada orang ramai sehingga mencecah lebih kurang 400 orang secara keseluruhan yang telah diadakan di keempat-empat daerah.

Majlis selawat telah dipimpin oleh Kumpulan Al Mureed dan disertakan dengan tazkirah yang disampaikan oleh penceramah undangan dari PDI, Dr. Haji Ismuhadi bin Haji Abdullah.



SEBAHAGIAN para peserta yang menghadiri Majlis Kemuncak Selawat Empat Daerah sempena Sambutan Isra' Mi'raj Tahun 1436 Hijrah yang diadakan di Balai Sarmayuda, Dewan Bahasa dan Pustaka (atas dan bawah).



PEMANGKU Timbalan Pengarah Penerangan, Dayang Hajah Noorashidah binti Haji Aliomar menyampaikan hadiah kepada Johan Pidato Awang Tajjul Hakim bin Haji Masri.

Awang Tajjul Hakim johan Pertandingan Pidato

Berita dan Foto : Noraisah Muhammed

DAERAH BELAIT, Sabtu, 30 Mei. - Awang Tajjul Hakim bin Haji Masri dari Sekolah Menengah Pengiran Jaya Negara Pengiran Haji Abu Bakar, Kuala Belait muncul johan Pertandingan Pidato bagi sekolah-sekolah menengah, maktab dan vokasional Daerah Belait Sempena Memperingati Penubuhan Jabatan Penerangan Ke-63 Tahun yang diadakan di Taman Persiaran Kuala Belait, di sini.

Hadir selaku tetamu kehormat majlis ialah Pemangku Timbalan Pengarah Penerangan, Dayang Hajah Noorashidah binti Haji Aliomar.

Pertandingan disertai oleh lapan pelajar yang mewakili sekolah dan maktab masing-masing terdiri dari Sekolah Menengah Chung Ching, Seria; Sekolah Menengah Sayyidina Ali, Kuala Belait; Sekolah Menengah Pengiran Jaya Negara Pengiran Haji Abu Bakar, Kuala Belait; Sekolah Saint James, Kuala Belait; Sekolah Saint John, Kuala Belait; Maktab Kejuruteraan Jefri Bolkiah, Kuala Belait; Sekolah Chung Hua, Kuala Belait dan Sekolah Menengah Pengiran Anak Puteri Hajah Rashidah Sa'adatul Bolkiah, Lumut.

Pertandingan antara lain bertujuan untuk membina keyakinan diri dalam kalangan pelajar selain menggalakkan dan memantapkan kemahiran para pelajar menggunakan bahasa Melayu di hadapan khalayak ramai serta memupuk semangat patriotisme yang berdaya saing secara positif.

Pertandingan juga dihasratkan sebagai salah satu platform untuk membiasakan para pelajar menyampaikan mesej secara lisan yang mengandungi idea, menguraikan dan merumuskan secara berkesan.

Terdahulu majlis dimulakan dengan bacaan Surah Al Faatihah dan Doa Selamat diikuti dengan nyanyian lagu kebangsaan dan bendera negara serta diikuti dengan ucapan alu-aluan daripada Pemangku Ketua Cawangan Penerangan Belait, Awang Eddy Iswandy bin Haji Ismail.

Sempena Memperingati Penubuhan Jabatan Penerangan Ke-63 Tahun turut diadakan ialah petak-petak pameran dari setiap bahagian, cawangan dan unit di Jabatan Penerangan serta petak-petak pameran produk-produk mukim dan kampung di Daerah Belait.

Manakala pada sebelah petangnya pula diadakan Jerayawara Penerangan yang disampaikan oleh pegawai-pegawai dari Unit Perkhidmatan Awam, Jabatan Penerangan yang antara lain mencernakan mengenai misi dan visi serta strategi kerja Jabatan Penerangan dalam penyaluran maklumat seperti media cetak, komunikasi bersemuka dan media baru.